

2. oktober 2023

UKA2023/23

**Umiarsualivimmiinnermut akileraarutit pillugit Inatsisartut inatsisaata  
allanngortinnera pillugu Inatsisartut inatsisissaannut siunnersuut (Umiarsuarni takornarianik  
angallassisuni ilaasut akileraarutaannik atuutilersitseqqinneq)**

Siunnersuuteqartoq: Aningaasaqarnermut Akileraartarnermullu Naalakkersuisoq

Siullermik Siumumiik Aningaasaqarnermut Akileraartarnermullu Naalakkersuisoq qutsavingerusupparput, umiarsuarni takornarianik angallassisuni ilaasunut akileraarummik atuutsittilemmissamut siunnersuutaannut.

Siumumiik tulluarsorivarput umiarsuit takornariartaatit nunatsinnut tikittartut akitsuuserneqartarnissaat. Tassami amerlanertigut umiarsuarsuit tamakkua takornarissat sutigut tamatigut atungassaat isumangereersimasarpaat. Tamanna kinguneqartarpoq nunami tikiffigisami aninigaasanik kaaviaartitsinerat annikiginarsinnaasarluni. Tassami illoqarfinni, nunaqarfinnilumi niungaangamik inuit najungaqartut atungasaanik inangiisnaammata. Naak, ilaatingooriaq misigisassarsiornikkut aamma suliffissanik pilersitseqataasaraluarlutik.

Siumumiik Maluginiarparput tusarniaanermi suliffeqarfippaalussuit oqaaseqarsimasut, tamakkualu Naalakkersuisut aamma ilaatigut tingulluarsimangaat, ilaalli aamma allannguineramik kinguneqarsimanngittut. Tusarniaavigineqarsimasut neriuppugut suliap ingerlanerani pisariaqarpat itisiliinissaannik periarfissinneqarsinnaasut.

Siumumiik isumaqarpugut takornariartaatit mikinerumaat nunatsinnut tulluarnerusasut, taakkuami talittarfinnut minnerusunut talissinnaasarput, takornariallu sinerissami agguarluarnissaanut aqqutisiuussilluni. Tassami takornariartaaterujussuit annerpaamik talittarfiit marluk tikikkajuttarsimavaat, nalunaranilu tassani talittarfiit anginerit soorlu Nuuk annerusumik tikittarsimassangaat.

Siumumiik eqqumaffigeqqarput Nuummi, Ilulissani, Qaqortumilumi mittarfiit sanaartorneqartut naammassingajalernerat. Naammassippatalu naatsorsuutigineqartoq timmisartumik takornarissat tikerartalernissaat. Taamaattumik Siumumiik isumaqarpugut, isumatusaarnerussasoq Naalakkersuisuit pilersaarusionerminni, akitsuutillu nalilernerani umiarsuit takornariartaatit sumut talittarnissaanut pilerinarsaarisinnaanissaat. Tassami takornarissat sineriammi siaruarluarunik illoqarfiit, nunaqarfiit, kommunit nalogiinnerusumik ineriartorsinnaaniassammata. Soorlu mittarfittaartussaannngittut immaqqa nittarsaannerisigut, akitigullu unammillersinnaasumik aaqqiisoqarsinnaappat.

Siumumiik innersuutigissavarput, inatsit imannak aqqinneqassasoq, Naalakkersuisut ukiumut ataasiaq akinik nalimmassaasinnaanissaanut periarfissaqassasoq. Nalunngilarpummi pisariuallaassasoq ukiut tamaasa inatsisip allanngornissaanut suliaqassagutta, taamaattumik Nalunaarutikkut allannguisoqarsinnaaneranut periarfissiisumik inatsisiliortoqarnissaa innersuukkusupparput.



Taamaasillutami nunanik allanik unammillerneqarnerput aamma aqulluarnerusinnaassangatsigu.

Siumumiik suliffeqarfiit tusarniaavigineqarsimasut sukumiisumik akissuterpassuinut aamma qujarusuppugut. Siumumiillu isumaqarpugut, aatsaat takornariartaat aallareerpat akiliisinnagu, siumoortumik tikinnginnerani pilersaarutaat naapertorlugu akiliisinneqareertarsinnaasut. Aallarpallu naatsorsorneqarsinnaassaaq utertuussanersut imaluunnit akiliutitik ilaqqissaneraat. Taamaasilluta isertitassat aamma allaffissornikkut qulakkeersinnaassangatsigit.

Siumumiik isumaqarpugut aamma umiarsuit imartatsinnut isertartut akiliisarnissaannut periarfissamik misissuisariaqartugut aammalu nationalpark- imut isertarnerut akia nalimmassarluarlugu qaffattariaqartoq.

Siumumiik inatsisissap Aningaasaqarnermut akileraartarnermullu ataatsimiisitaliamut ingerlaqqinnissaa, sukumiisumillu suliarineqarnissaa innersuupparput. Pisariaqarpat aamma inuussutissarsiornermut aatsitassanullu ataatsimiisitaliamut ingerlatinneqarsinnaavoq.

Kuno Fencker, Siumut